



13. januar 2010

Inatsisartut suleriaasianni § 36, immikkoortoq 1 naapertorlugu matumuuna imaattumik Naalakkersuisunut apeqquteqarpugut:

**Apeqqut: ATASSUT-mit uissuummissutigeqisatsinnik paasivarput Paamiuni imarsiornermik ilinniarfiup aqumiunngornianut immikkoortortaa matuneqarsimasoq, naak massa Inatsisartut ataatsimoortut matuneqarnissaa akerlerigaat, tamanna Naalakkersuisut qanoq nassuiaatissaqartippaat Inatsisartullu piumasaqaataat naammassiniarlugit iliuuseqassamaarpat?**

(Inatsisartuni ilaasortat Finn Karlsen, Siverth K. Heilmann, Knud Kristiansen, ATASSUT)

**Tungavilersuut:**

Isornarluinnarpoq akuersarneqarsinnaananilu Naalakkersuisut toqqarsimassappassuk Inatsisartut ataatsimoortut piumasaqaataat malinnagu nammineq kissaatigisaq naapertorlugu Paamiuni imarsiornermut ilinniarfiup naalaganngornianut immikkoortortaa matuniarsimassappassuk, Inatsisartummi piumasaraat nunatsinni naalaganngorniarnermik ilinniarneq matuneqassanngitsoq taamaammallu paasiniaqqissaarneqassasoq ilinniarnermik naammassinnittartut ukiut kingulliit ingerlaneranni appariarujussuarsimanagerat sumik pissuteqarnerisooq tamatumalu kingorna ilinniarfiup nunatsinni atuutiinnarnissaa qulakkeerniarlugu aqqiissutissanik suliaqartoqassasoq.

Eqqaamaneqartariaqarpoq ilinniarfik pineqartoq nunatsinnut nunatsinnilu pissutsinut naleqqussagaammat aammalu Danmarkimi imarsiornermut aqutsisoqarfik suleqatigalugu ilinniarfik inerisarneqarnikummat taamaalillutik naalagannorniarumasut oqaatsititigut piginnaasat killeqarnerat aporfiginagu naalagannorniarinnaanerit periarfissaatinneqarluni.

Inatsisartut piumasaqaataat Naalakkersuisunut eqqaasinniarlugu pineqartoq pillugu Inatsisartut suliarinninnerat matumani ersersissavarput:

**1. Aningaasaqarnermut Ataatsimiititaliap aningaasanut inatsisissap 2010-moortup aappasaaneerneqarnissaanut isumaliutissiissutaani Paamiuni imarsiornermik ilinniarfik pillugu kaammattuutai:**

Konto pingaarneq 40.91.08 Inuussutissarsiutinut ilinniartitaanerit ataani ilinniarfiit

Angallatini naalagannornianik ilinniartitaaneq Danmarkimut nuunneqassasoq Naalakkersuisut paasissutissiissutigaa. Ilinniarnermik naammasinnittartut ukiut kingulliit ingerlaneranni appararujussuarsimanerat nuussinermut tunuliaqutaavoq. Taama ikileriarnerannut ilaatigut pissutaasinnaagunarpoq ilinniartitaanerup Nuummit Paamiunut nuunneqarnera (apeqqut 10.21).

Namminersornerulluni Oqartussaanerup eqqunneqarnerata kingorna ilinniartitaanerit nunatsinnut nuunneqartut siulliit ilagalugit angallatani naalagannorniat ilinniarfiat nuunneqarpoq. Taamaattumillu namminersornerup eqqunneqarnerata kingorna taassuma siullersaalluni Danmarkimut utertinneqarnera uggornarpoq. Ilinniarfiup Nuummut imaluunniit nunatsinni illoqarfimmut anginnermut allamut nuunneratigut naammattunik ilinniartoqaqqilersinnaanersoq misissoqqullugu Kultureqarnermut Ilinniartitaanermullu

**2. Aningaasaqarnermut Ataatsimiititaliap aningaasanut inatsisissap 2010-moortup pingajussaaneerneqarnissaanut isumaliutissiissutaani Paamiuni imarsiornermik ilinniarfik pillugu kaammattuutai:**

Konto pingaarneq 40.91.08 Inuussutissarsiutinut ilinniartitaanerit ataanni ilinniarfiit

Angallatini naalagannornianik ilinniartitaanerup Danmarkimut nuunneqalersaarnera

isumakulunnartillugu Aningaasaqarnermut Ataatsimiititaliap aappassaaneerinissamut isumaliutissiisummi oqaatigaa. Taamaattumik nuussinerup 2010-mi ataatsimiititaliamit iluarisimaarneqarpoq. Taamaaliornikkut ilinniartitaanerit nunatsinni ingerlatiinnarneqarsinnaanersut misissuiffigineqaqqaassaaq.

Suliap taassuma ingerlanera pillugu Kultureqarnermut Ilinniartitaanermullu Ataatsimiititaliap ingerlaavartumik ilisimatinneqartarnissaa Aningaasaqarnermut Ataatsimiititaliamit qinnutigineqassaaq.

*Ilanngussaq H innersuussutigineqarpoq.*

**3. Paamiuni imarsiornermut ilinniarfik pillugu Kultureqarnermut Ilinniartitaanermullu Ataatsimiititaliap Aningaasaqarnermut Ataatsimiititaliamut allagaa 14. november 2009-meersoq (Ilanngussaq H):**

Konto pingaarneq 40.91.08 inuussutissarsiutinut ilinniartitaanerit ataani ilinniarfiit

Pineqartumut tunngatillugu Aningaasaqarnermut Ataatsimiititaliap innersuussutaanut ataatsimiititaliaq isumaqataavoq. Taamaattumik ataatsimiititaliap kaammattuutigissavaa Angallatinut Naalaganngorniartut Ilinniarfiat Paamiuniittoq Danmarkimut nuunngikkaluarlugu nunatsinni illoqarfiit annerit arlaannut nuunneratigut soqutiginninnerup ingerlateqqinneqarnissaa misissorneqassasoq.

Tassa Inatsisartut ataatsimoortut Aningaasaqarnermut Ataatsimiititaliaq aammalu Kultureqarnermut Ilinniartitaanermullu Ataatsimiititaliaq aqutugalugit piumasaqarput naalaganngorniarluni ilinniarfik nunatsinniiginnaassasoq!

ATASSUT-mit kissaatigaarput Naalakkersuisut qanoq nassuiaatissaqartippaat Inatsisartullu piumasaqaataat naammassiniarlugit iliuuseqassamaanersut paasissallugu.

Inussiarnersumik inuulluaqqusilluta

ATASSUT sinnerlugu Inatsisartuni ilaasortat